

18. gr.

Ef upp kemur ágreiningur um störf starfsmanna innan sóknar sem ekki tekst að leysa þar á vettvangi, skal vísa málinu til prófasts.

Nýbyggingar og viðhald.

19. gr.

Ef aðalsafnaðarfundur ákveður að reisa nýja kirkju, endurbyggja eða breyta verulega kirkju skal sóknarnefnd hafa samráð við bygginga- og listanefnd þjóðkirkjunnar. Sama hátt skal hafa á um aðrar fasteignir sóknarinnar svo sem safnaðarheimili.

Gildistaka.

20. gr.

Starfsreglur þessar, sem settar eru skv. heimild í 55. og 57. gr. laga um stöðu, stjórn og starfshætti þjóðkirkjunnar nr. 78/1997, öðlast gildi 1. janúar 1999.

Ákvæði til bráðabirgða.

Kosið skal til allra sóknarnefnda landsins á aðalsafnaðarfundum á árinu 1999, sbr. 52. og 53. gr. laga um stöðu, stjórn og starfshætti þjóðkirkjunnar nr. 78/1997. Að tveimur ár-um liðnum frá kosningunni skal nokkur hluti kjörinna aðalmanna og varamanna ganga úr nefndinni, þ.e. einn af þremur, tveir af fimm, þrír af sjö og fjórir af níu, og ræður hlutkesti, nema samkomulag sé innan nefndarinnar. Kjörtímabili annarra nefndarmanna lýkur eftir fjögur ár. Skal þessi tilhögun síðan gilda til frambúðar að breyttu breytanda. Að lokinni kosningu sóknarnefndar skal kjósa safnaðarfulltrúa og varamann hans úr hópi sóknarnefndar til fjögurra ára, sbr. 56. gr. laga um stöðu, stjórn og starfshætti þjóðkirkjunnar nr. 78/1997.

Reykjavík, 10. desember 1998.

Jón Helgason

forseti kirkjuþings.

Gunnar Sveinsson

þingskrifari.

STARFSREGLUR**um héraðsfundi og héraðsnefndir.****Hlutverk héraðsfunda, réttur til setu á héraðsfundi.**

1. gr.

Héraðsfundur er aðalfundur prófastsdæmis og fjallar um málefni sem varða starf þjóðkirkjunnar í prófastsdæminu. Þar fara fram starfsskil héraðsnefndar og sókna vegna síðasta árs, svo og reikningsskil héraðssjóðs og kirkna. Héraðsfundur samræmir og markar sameiginlegt kirkjustarf í prófastsdæminu og ráðstafar héraðssjóði fyrir næsta ár.

2. gr.

Á héraðsfundi mæta:

- a) þjónandi prestar í prófastsdæminu
- b) tveir sóknarnefndarmenn, þar af annar formaður
- c) djákna, starfandi í prófastsdæminu
- d) kirkjuþingsmenn.

Starfsmönnum sókna og prófastsdæmis svo og öllum áhugamönnum innan þjóðkirkjunnar um kirkjuleg málefni er heimilt að mæta á héraðsfundi með málfrelsi og tillögurétt.

Á héraðsfundi hafa atkvæðisrétt 2 fulltrúar frá hverri sókn, og starfandi prestar og djáknar. Afl atkvæða ræður úrslitum mála á héraðsfundi. Verði atkvæði jöfn ræður atkvæði prófasts.

Fundarboð, fundarstaður og fundarefni.

3. gr.

Héraðsfund skal halda eigi síðar en 1. október ár hvert. Héraðsnefnd ákveður fundarstað.

4. gr.

Prófastur boðar héraðsfund skriflega með hálfis mánaðar fyrirvara og skal í fundarboði greina frá dagskrá fundar. Fundarboð skal sent öllum sóknarnefndum, prestum og djáknum í prófastdæminu. Fundurinn skal einnig auglýstur.

Rétt boðaður fundur er lögmatgur.

5. gr.

Á fundinum skulu tekin fyrir þessi mál:

1. Héraðsnefnd skal skýra frá starfsemi sinni á liðnu ári og gera grein fyrir framkvæmd ályktana og samþykktu síðasta héraðsfundar.
2. Starfsskýrslur sókna og nefnda frá síðasta ári skulu kynntar.
3. Skýrslur frá prestastefnu, kirkjuþingi og leikmannastefnu skulu kynntar.
4. Reikningar sókna, kirkjugarða og héraðsnefndar fyrir síðasta reikningsár lagðir fram til afgreiðslu.
5. Tillögur héraðsnefndar um starfsemi á vegum prófastsdæmis, þ.m.t styrkir til einstakra sókna og fjárhagsáætlun fyrir héraðssjóð fyrir næsta almanaksár.
6. Ákvörðun skal tekin um greiðslur til héraðsnefndarmanna fyrir störf þeirra á liðnu ári.
7. Sameiginleg mál sóknarnefnda er varða rekstur og starfsmannahald.
8. Kosningar:
 - a) kosning aðalmanna og varamanna til héraðsnefndar, annarra en formanns, til tveggja ára í senn
 - b) kosning tveggja skoðunarmanna eða endurskoðenda reikninga héraðssjóðs tveggja til vara til tveggja ára í senn
 - c) kosning tveggja fulltrúa og tveggja varamanna þeirra á leikmannastefnu til fjögurra ára í senn
 - d) kosning aðalmanns og varamanns til fulltrúaráðs Hjálparstofnunar kirkjunnar til tveggja ára í senn.
9. Aðrar kosningar eða tilnefningar sem heyra undir héraðsfund.
10. Önnur mál.

Aukahéraðsfundir.

6. gr.

Prófastur boðar aukahéraðsfund, ef þurfa þykir. Skyllt er að boða slíkan fund, ef fjórðungur atkvæðisbærra héraðsfundarmanna óskar þess. Ákvæði starfsreglna þessara eiga við um slíka fundi eins og við getur átt.

Hlutverk héraðsnefnda.

7. gr.

Héraðsnefnd er framkvæmdanefnd héraðsfundar. Hún er í fyrirsvari fyrir prófastsdæmið að því er varðar sameiginleg málefni prófastsdæmisins.

Héraðsnefnd skípa þrjú menn. Formaður nefndarinnar er starfandi prófastur. Héraðsfundur kýs aðra nefndarmenn, einn prest og einn leikmann, til tveggja ára í senn og varamenn þeirra með sama hætti. Skal haga kosningu þannig að prestur og varamaður hans er kosinn annað árið en leikmaður og varamaður hans hitt. Nefndin skiptir að öðru leyti sjálf með sér verkum.

Verkefni héraðsnefndar.

8. gr.

Verkefni héraðsnefndar eru sem hér segir:

1. Héraðsnefnd fylgir eftir samþykktum héraðsfunda og sendir þær biskupi og öðrum, sem hlut eiga að máli.
2. Héraðsnefnd fer með stjórn héraðssjóðs, sbr. 12. gr.
3. Héraðsnefnd ræður starfsmenn til að gegna einstökum verkefnum, sem héraðsfundur hefur samþykkt.
4. Héraðsnefnd sér til þess að starfsemi og rekstur, samkvæmt ákvörðunum héraðsfundar, færsla bókhalds, varsla gagna og önnur atriði í rekstri séu jafnan í góðu horfi.

9. gr.

Prófastur kveður héraðsnefnd saman til fundar svo oft sem þörf krefur. Skylt er að halda fund ef tveir nefndarmanna óska þess. Nefndarmenn fá greidda reikninga fyrir útlagðan kostnað úr héraðssjóði, og fyrir fundarsetu.

Um héraðssjóði og framlög til þeirra.

10. gr.

Starfræktur skal héraðssjóður er kostar kirkjulega starfsemi innan prófastsdæmis.

11. gr.

Tekjur héraðssjóðs eru sértekjur og allt að 5% sóknargjalda prófastsdæmisins samkvæmt ákvörðun héraðsfundar.

12. gr.

Héraðsnefnd fer með stjórn héraðssjóðs. Hún ákveður úthlutanir úr sjóðnum og sér um reikningshald hans.

13. gr.

Endurskoðun reikninga sjóðsins annast tveir endurskoðendur eða skoðunarmenn kjörnir af héraðsfundi til tveggja ára í senn.

Gildistaka.

14. gr.

Starfsreglur þessar, sem settar eru skv. heimild í 32., 55. og 57. gr. laga um stöðu, stjórn og starfshætti þjóðkirkjunnar nr. 78 1997, öðlast gildi 1. janúar 1999.

Ákvæði til bráðabirgða.

15. gr.

Kjósa skal til héraðsnefndar sbr. 5. og 7. gr. á héraðsfundi árið 1999. Umboð núverandi kjörinna nefndarmanna fellur brott þegar kosning hefur farið fram.

Reykjavík, 10. desember 1998.

Jón Helgason
forseti kirkjuþings.

Gunnar Sveinsson
þingskrifari.

STARFSREGLUR

um prófasta.

Útnefning prófasts.

1. gr.

Biskup útnefnir prófasta úr hópi þjónandi presta í prófastsdæminu að höfðu samráði við héraðsnefnd. Presti er skylt að takast á hendur prófastsembætti.

Gildistími útnefningar.

2. gr.

Útnefning gildir í fimm ár. Útnefning skal enn fremur gilda sjálfkrafa áfram ef prófastur tekur við öðru prestsembætti innan sama prófastsdæmis í beinu framhaldi af starfslokum í fyrra embætti.

Starfslok prófasts.

3. gr.

Útnefning prófasts fellur sjálfkrafa niður við lok prestsþjónustu hans í prófastsdæminu, sbr. lög um réttindi og skyldur starfsmanna ríkisins. Gildir það einnig þótt hlutaðeigandi sé í beinu framhaldi af starfslokum settur til að gegna áfram prestsembætti innan prófastsdæmis.

Telji prófastur sér óhægt að gegna embættinu vegna veikinda eða af öðrum sérstökum persónulegum ástæðum er biskupi heimilt að leysa hann undan prófastsembættinu þótt hann gegni prestsembætti sínu eftirleiðis.

Forföll eða leyfi prófasts.

4. gr.

Biskup setur annan sóknarprest í prófastsdæminu eða nágrannaprófast til að gegna prófastsembætti um stundarsakir ef sérstaklega stendur á svo sem vegna fjarveru, leyfis eða veikinda prófasts, prófasts missir við, eða er veitt lausn um stundarsakir.

Vanhæfisreglur.

5. gr.

Reglur stjórnslulaga um sérstakt hæfi gilda um störf prófasta. Biskup sker úr um hvort um vanhæfi er að ræða. Víki prófastur sæti í tilteknu máli vegna vanhæfis setur biskup prófast til að fara með málefni það sem um er að tefla.

Ef prófastur er fyrirsjáanlega vanhæfur til að sinna tilteknu verkefni almennt, svo sem eftirliti með eigin prestssetri, skal biskup setja nágrannaprófast til að sinna því verkefni.